

傷寒論精義折中 下

最新傷寒論精義折中卷下

豫州朱 第壺山氏著

受業
鞏縣孫素錦
西平于華珍

鄒縣靳懷靖
商水李君通校字

陽明篇

陽明總論

161

天地以水火二氣。化生萬物。水火交、則蒸而爲溼。水火不交、則化而爲燥。燥者陽明之本氣也。內經曰、陽明之上。燥氣治之。中見太陰。唐天彭曰、在辰爲申酉。申屬坤土。酉屬兌金。在人屬胃與大腸。大腸爲燥金。胃爲燥土。在四時爲七八月燥金用事之候。金性主澁。收止水火各返其宅。水不潤、則草木黃落。火不蒸、則膏脈枯竭。胃與大腸。皆消導水穀之府。胃秉燥氣。通體皆有微絲細管。吸水出胃。走入膈膜。下行入膀胱。若胃中燥氣不足。則水停矣。食入、則胃熱轉至以腐爛之。熱卽燥氣。食在胃中未盡化者。下行入小腸以化液。所剩糟粕。乃入大腸。尙有餘液。必得大腸燥金之氣。以吸收之。餘液卽盡。乃成堅糞。若大腸燥氣不足。則成溏瀉。此胃與大腸。必有此燥氣。而後能消水穀也。然燥氣太過。又成結硬。必賴太陰之溼以濟之。所云中見太陰者

此也。又云陽明不從標本、從中見之化。賴太陰溼氣以潤其燥也。南陽重存津液三字。亦是此義。

夫肺與大腸相表裏者。肺系之油網。下連膈膜。又下連版油。至下焦、其油網與大腸相接。肺金腴潤。注於大腸。則燥而不甚。

夫脾與胃相表裏者。以膜相連。胃中食物、化液歸脾。從膜之中布達、乃生膏油。膏油、脾之物。膏油功用。上濟胃氣。下滋潤大腸。膏油色黃。故病能發黃瘡。膏油透出筋骨之外。是爲肥肉。名曰肌。邪可由肌肉循膏油、內入於胃。胃絡通心。西人有曰。胃中化液。有大管導之上行、至頸會管、遂與心之血管會合。若胃中燥火。由絡入心亂神、成譫語。燥熱相合。胃家實成譫語。又胃管上通口、故舌上起芒刺。口乾燥。燥屎在大腸、必發潮燒。應在申酉時、始從下上潮也。

又陽明經行身之前。從面至腹、抵足趺。臍下血室有衝脈兩條。夾臍旁而上至喉間。是衝脈麗於陽明之部分。陽明胃中汁液化而爲血。下入血室。血室一名氣海。膀胱所化之氣。歸於氣海。上出於口鼻。亦從臍旁由陽明道路而上。是衝氣隨脈上於胃。各經亦皆

有陽明證。以胃爲水穀之海。各經秉氣於此焉。

三陽明提綱

162

問曰、病有太陽陽明。有正陽陽明。有少陽陽明。何謂也。答曰、太陽陽明者。脾約是也。正陽陽明者。胃家實是也。少陽陽明者。發汗、利小便、胃中燥、煩實、大便難是也。

太陽陽明者。太陽病不解。邪熱從太陽肌肉。入內之膜油。脾主膏油。被邪熱熬灼而枯縮。不能滋潤大腸。腸亦枯濇。是爲脾約。指脾之膏油收縮而言也。少陽陽明者。三焦膜網與胃相連。膜網之水、外從腠理而汗。下從小便而泄。胃中反無水而乾燥。燥甚、則煩擾不堪。成爲胃中實證。大腸與胃。同秉燥氣。所以大便難。

正陽陽明者。燥爲陽明之本氣。燥氣太過。無中見太陰溼土之化。燥氣盛於上。則胃氣實於內。此胃家實三字。爲陽明之提綱。後稱陽明病三字。俱有胃家實三字在內。言以手按胃中實硬也。大陷胸證、按之實硬、卽名實熱。梔子豉證、按之心下濡、卽名虛煩。胃中亦當以濡硬分虛實。

問曰、陽明病外證云何。答曰、身熱、汗自出、不惡寒、反惡熱也。

唐天彭曰。身熱自汗、與太陽正同。太陽之邪在肌肉。則翕翕發熱。淅淅自汗出。肌肉卽肥肉。與內之膏油皆屬脾胃。故胃熱亦發見於肌肉而爲身熱。自汗與太陽同。惟不惡寒、反惡熱、是陽明燥熱之的證。與太陽惡寒不同。

按汗出又有二。(一)太陽病、初得發其汗。汗出不徹。因轉屬陽明者。太陽標熱之氣。不能隨汗而泄。卽與燥氣合也。(二)傷寒發熱無汗、嘔不能食、(論曰陽明病能食名中風不能食名中寒)而反汗出濺濺然者。是轉屬陽明。以水液外泄。陽明內乾也。按不惡寒、有得病之一日不發熱而惡寒者。至二日惡寒將自罷。燥氣內出。卽自汗出而惡熱。以胃居中土。凡表寒裏熱之邪。無所不歸。無所不化。皆從燥化而爲實。實則無所復傳也。

陽明病因由於太少

164

問曰、何緣得陽明病。答曰、太陽病、若發汗、若下、若利小便、此亡津液、胃中乾燥

。因轉屬陽明。不更衣、內實、大便難者、此名陽明也。

按人身之津液。從胃中水穀而生。若邪熱在太陽之表。當發汗。邪熱在太陽之裏、當下。邪熱在少陽三焦、當利小便。此三者、皆亡胃中之津液。胃無津液必乾燥。燥氣太過、必合太陽之標熱。少陽之火氣。轉屬陽明。陽明因熱火之助、其燥益甚。燥甚必結。腸內必實。當然不更衣。卽欲更衣、大便亦難。此太陽少陽、爲陽明病一大原因也。

陽明病脈大

傷寒三日陽明脈大。

按三日爲少陽主氣。邪歸中土。無所復傳。不能從少陽之樞而解。陽燥過盛。陰血耗竭。脾胃過虛。眞氣外洩。是以脈大。經曰、脈大者病進。洩利、失血、久嗽者忌之。又曰大而有力爲實。實而無力爲大。

少陽陽明證

陽明中風。口苦、咽乾、腹滿微喘、發熱惡寒、脈浮而緊、若下之、則腹滿、小便難也

按少陽陽明者。由少陽合於陽明也。先論少陽病。少陽提綱、爲口苦、咽乾、目眩者。是三焦根於腎系。乃命門水中之陽。故曰少陽。從腎系達肝系與膽通。水中之陽、上生膽木、故曰少陽膽寄於肝、秉風化而生火。故曰風火之主。設膽木之火病。火從膜中上入胃口。胃開竅於口。三焦脈又挾咽。故口苦咽乾。膽木之風病。則風從膜中上走空竅、入目系、合肝脈。肝脈貫腦入目。膽經與之合。則風木相煽而目眩。旋轉不定。現出風中有鬱火之象。此節口苦咽乾、是少陽內證。浮緊爲絃、是少陽脈。邪在腠理、外肌內肉。標陽外鬱而發熱。衛陽內阻而惡寒。寒熱並見。混同往來。是少陽外證。陽明外主肌肉。內主膏油。少陽風火、由肌肉內合陽明之燥。（易曰火就燥）盤踞中土。膏油被蒸、則腹滿於下。胃絡通心。明明燥火熱三者合併。上灼肺金。金被熏蒸。令不下行。則微喘於上。若下之則腹更滿者、邪因下腸胃而引入裏。不能借少陽達於表也。少陽三焦司決瀆。入裏則不能暢行三焦。所以小便難。

傷寒、脈浮而緩、手足自溫、是爲繫在太陰。太陰者、身當發黃。若小便利者、不能發黃。至七八日大便秘者、爲陽明也。

傷寒轉屬陽明者。其人澀澀然微汗出也。

按首節傷寒脈浮而緩者。浮爲太陽。緩爲太陰。浮而緩者。邪熱由太陽入太陰。（脾）手足自溫者、太陰爲至陰。無熱可發。因爲胃行其津液以灌四旁。故得主四肢。而發熱於手足。所以太陰傷寒、手足自溫。是爲繫屬太陰。足太陰脾主膏油。熱蒸膏油。身當現出膏油之黃色。若手太陰肺金無病。清令下行。三焦決瀆無愆。小便自利者。油膜之溫熱。隨之下洩。當然不發黃。然小便愈利。胃中水穀之精竭。胃中之燥氣。以失其水潤而增。至七八日。胃燥已久。腸亦就乾。大便秘者。此太陽病、又出太陰而入陽明。此陽明與太陰相表裏也。後節傷寒轉繫陽明者。其人不僅大便秘。且澀然微汗出。是邪熱從膜油中入胃。胃中燥氣與太陽標熱合。蒸欲外越。由肌肉而透皮膚。而又鬱欲內陷。越不遽越。是以惡熱自汗出。邪不與汗俱出也。此非由太陰轉屬陽明也。

陽明病不能食爲胃中冷

陽明病。若中寒不能食。小便不利。手足澀然汗出者。此欲作固瘕。必大便初硬後溏。所以然者。以胃中冷。水穀不別故也。

按陽明病、爲胃家實。若中寒過甚。不得本經燥氣之化。不能消穀則不能食。水入胃中。不能從胃之毛細管將水散出。走入膜膈。從膀胱下出。故小便不利。胃中燥氣不足。不能吸受脾土溼潤。脾中津液。自然外泄。四肢屬脾。故手足澀然汗出。脾溼過剩。流入大腸。雖大腸屬燥金。以溼甚故。大便欲固而仍不固。腸中欲瘕而仍不瘕。現出大便初頭因躁而硬。後必因寒而溏。此胃中虛冷。所以不能泌別水穀也。

陽明病欲食爲穀氣勝

陽明病。欲食。小便反不利、大便自調、其人骨節疼、翕翕如有熱狀、奄然發狂、澀然汗出而解者、此水不勝穀氣、與汗共並、脈緊則愈。

唐天彭曰。欲食、大便自調、是陽明之穀氣勝。小便不利、是太陽之水不化。其人骨節疼、是太陽之身疼痛。翕翕如有熱狀、是太陽桂枝證之翕翕發熱。此乃太陽水中所

化之氣。沸鬱於肌肉間。皆太陽病。本不能解。惟賴陽明之穀氣勝。外合太陽。兩陽相併。是爲重陽。經曰、重陽狂。故必奄然發狂。漑然汗出而解。南陽又自注曰、此爲太陽水中所化之氣。不勝胃中穀氣。而穀氣有權。得發於肌肉之間。與太陽之汗交併而出。故得解也。又注曰、脈緊則愈。亦是太陽外閉。陽明內搏之脈。此解甚超。

胃中虛冷不可攻熱

170

陽明病、不能食、攻其熱必噦。所以然者。胃中虛冷故也。以其人本虛。故攻其熱必噦。

按胃家燥實、爲陽明病。而胃中虛冷者。亦陽明病。凡治陽明病。一眼注定胃家實。一眼注定胃中虛。實者燥甚。虛者冷甚。若陽明病、身必熱。必不惡寒。惟不能食。亦可斷定其胃中虛冷。論曰、陽明病、不能食、名中寒是也。夫胃爲諸陽之本。胃虛冷則陽衰。胃陽衰、衆腑陽亦衰。何以能使身熱。不同身熱惡寒之太陽乎。內經曰、陽明之上。燥氣治之。今胃中虛冷。是腑雖寒而經不寒。若伏氣化熱。內合陽明。當然身蒸蒸發熱不惡寒。甚且反惡熱。不過因胃中虛冷。無燥屎。不發潮熱耳。切不可

因陽明身熱。用寒涼藥誤攻其胃中。攻則燥氣更感不足。不能下行。反而上逆爲噦。然不但噦已也。燥氣不足。停水爲害。業醫者當顧及此。

胃中虛冷欲作穀瘕

171

陽明病。脈遲。食難用飽。飽則微煩、頭眩、必小便難。此欲作穀瘕。雖下之、腹滿如故。所以然者。脈遲故也。

按此節陽明病、爲胃中虛冷。內經曰、食入於胃。濁氣歸心。淫精於脈。脈氣流經。今胃中虛冷。不能納穀。所以脈遲。食難用飽。卽所謂不能食。強飽、則食停於胃。阻礙心氣不能下行。故心微煩。阻滯既久。反而上逆。心與腦通。所以頭眩。胃虛冷不能化氣行水。三焦膜網必不清利。故小便難。穀不化則腐而蒸熱。水不行則鬱而生溼。溼熱相搏。灼及膏油。膏油熏發。欲作穀瘕。穀病在胃。瘕病在膜腠。若下之、則腸胃益虛。膏油如故。陽明外主肌肉。內主膏油。膏油生膜上。腹中乃膜油之大者。故腹滿不減。所以然者。陽證見陰脈。脈遲故也。治宜除胃腑之寒。復陽明之燥。消穀散飲。自然淫精於脈。不作遲象也。

胃虛無汗之陽明病

陽明病。法多汗。反無汗。其身如蟲行皮中狀者。此以久虛故也。

按陽明病、胃腑雖虛。其經仍燥。熱蒸肌肉。法當多汗。而反無汗者。汗爲胃中水穀之精。胃虛不能化氣行水。何能輸精皮毛。所以其身如蟲行皮中狀。內經曰、輸精皮毛。毛脈合精、行氣於腑。足見內而經脈。外而皮毛。皆稟氣於胃。胃久虛。皮毛經脈。皆無所稟矣。

頭痛無汗之陽明病

陽明病。反無汗。而小便利。二三日、嘔而欬、手足厥者。必苦頭痛。若不欬、不嘔、手足不厥者。頭不痛。

按此節、乃言陽明之氣。合寒氣上逆於頭。不能灌溉上下內外四旁也。陽明居中土。燥氣熏蒸。法當多汗。今反無汗。寒中於腠理。內合陽明。俾水穀之精不能外達也。寒合陽明。燥氣減煞。不能游溢入脾。散精上達。轉而下輸。故小便利也。二三日嘔而欬。胃氣不降。寒氣上逆也。手足厥者。胃陽虛寒。不能敷布其氣於四肢也。內經

曰、陽明之脈。循髮際至頭顱、陽明寒氣、牽連正氣而上逆。故必苦頭痛也。若不欬不嘔、手足不厥者、爲寒氣已除。陽明正氣四布。卽不上達。故不頭痛。

風熱上逆之陽明病

陽明病。但頭眩。不惡寒。故能食。而欬、其人必咽痛。若不欬者。咽亦不痛。

此節言陽明之氣。合風熱而上逆於咽。不得流通於下也。陽明中風。必上頭目。雖頭旋目眩、不在陽明提綱之內、惟不惡寒、屬陽明矣。陽明中風。胃熱加增、故能食。風熱上衝。肺被火灼、故欬。胃脈挾咽、故咽痛。程扶生曰、風邪下行故無汗。而小便利。風邪上行、故不惡寒、而頭眩。寒則嘔不能食。風則能食。寒則頭痛。風則咽痛。是風寒入胃之辨也。本節雖不重在此。亦當知之。

陽明病身發黃

陽明病、無汗、小便不利、心中懊懣者、身必發黃。

陽明病、被火、額上微汗出、小便不利者、必發黃。

按陽明主中土。其水穀之精。灌溉內外上下四旁。今燥氣過甚。爲病結於內。不能外

達皮毛則無汗。不能游溢精氣下輸於膀胱、則小便不利。胃之燥氣、由胃絡上通於心、則心中懊憹而煩悶。久鬱則膜上膏油、被其蒸熏。陽明外主肌肉。內主膏油。燥熱由內膜溢於外膜。周身皮膚。發現膏油之黃色。故身發黃。醫者不知所以無汗之理。誤以荊防薑麻羌獨桂葛之類、強發其汗。雖非熏針。亦名被火。火燥合併。其熱益甚。不能外溢。必循陽明經脈上額。故額上微汗出。汗出不徹。轉而下行。三焦膜網受其灼熱。決瀆失職。小便不利。夫陽明之脈。起於鼻、行髮際、至額顙。陽明之氣。內主膏油。外主肌肉。肌肉之間名腠理。一膜相連。今燥火之氣。既不能上舒。又不能下洩。不能不由中達外。溼熱相搏。其發黃必更甚也。

陽明病潮熱與盜汗

陽明病、脈浮而緊者。必潮熱發作有時。但浮者、必盜汗出。

按南陽脈法。脈緊者必咽痛。且應大腸有燥屎結束。必發潮熱。脈遲身涼、爲熱入血室。此節陽明病、爲胃家實。脈應大。乃大而兼浮。是陽明燥氣外越之象。而又兼現絃直有力之緊脈。是表閉陽鬱。遏抑燥火。皮膚屬表司於肺。肺通大腸。應主大腸中

燥屎實結。必潮熱發作有時。主大承氣湯下燥屎。若但浮而不緊。是盛陽不入於陰。表疏衛泄。寐時必出盜汗也。燥熱過甚。灼傷津液。陰不養陽。所以潛越。一清一斂。乃得治法。若解爲陽氣盡浮於外。及臥、陰血歸肝。兩不相顧。必爲浮陽盜去而汗出。則爲豪釐之失矣。

陽明病經熱必衄

176

陽明病、口燥、但欲漱水不欲嚥者。此必衄。

按陽明經行身之前。從面至腹抵足趺。陽明之脈。起於鼻。交額中。還出挾口。今陽明燥甚爲病。經燥口無不燥。不能不引水以潤之。然燥在經不在胃。以水潤口。其燥卽減。故但欲漱水不欲嚥。而又非一漱其燥卽去也。不過聊作眼前之救濟耳。陽明氣血皆多。經中燥熱過甚。必然逼血妄行。脈起於鼻。所以衄也。

陽明病津還胃中

177

陽明病、本自汗出。醫便重發汗、病已差、尙微煩、不了了者、此大便秘故也。以亡津液、胃中乾燥、故令大便秘。當問其小便幾日行。若本小便日三四行。今日再行。故

知大便不久出。今爲小便數少。以津液當還入胃中。故知不久必大便也。

按陽明提綱爲胃家實。外證爲發熱、汗自出、不惡寒、反惡熱。今陽明燥氣爲病。本當汗自出。燥熱內蒸。病並不隨汗而解。醫者非不知內清燥熱。乃清燥不澈。偏重發汗。外熱之病雖已差。而胃中猶燥者。津液因重汗而耗竭也。胃絡上通於心。心液亦感不足。所以內尙微煩。陽明病似了不了。胃燥無津液。大便必然乾燥而硬。南陽故自註曰、亡津液、胃中乾燥、故令大便秘也。今姑不問大便。當先問其小便幾日行。若汗出小便日三四行。今於微煩不了了之日。小便減少。至每日只一再行。其大便不久必自出。何哉、以大便皆胃腑之津液所施也。津液若還入胃中。足以灌溉大腸。故知不久必大便矣。

陽明病嘔多者忌攻

傷寒嘔多。雖有陽明證。不可攻之。

按陽明之上。燥氣治之。是燥爲陽明之本氣。若外感邪熱、與伏氣化熱、內合陽明燥氣、爲胃家實證。當然攻之。然遇胃氣虛者、亦不能無陽明燥氣之病。何以知陽明燥

氣爲胃氣虛。以傷寒嘔多者證之。何哉、胃氣虛。不能下行必上逆。所以嘔多也。醫者遇此。當然治其燥。尤宜顧其虛。胃氣不傷。庶可以托邪外出耳。不必呆講不可攻之四字。

陽明病心下硬滿者忌攻

179

陽明病。心下硬滿者。不可攻之。攻之利遂不止者死。利止者愈。

按陽明病。外有身熱自汗出不惡寒反惡熱之證。內有胃家實之證。今陽明病、不在胃而在心下。不見胃家實、而見心下硬滿。成胸前膈膜中之痞。不可攻胃。攻胃則胃之燥氣敗。大腸與胃、同秉燥氣。大腸氣亦敗。勢必下利。若利而自止。其胃中穀氣猶存。穢腐去而邪亦隨之而去。故其病愈。若利不止者。是穀氣盡也。必死。

陽明病面赤者忌攻

180

陽明病。面合赤色。不可攻之。攻之必發熱、色黃、小便不利也。

按陽明之脈循於面。今陽明病、其燥熱之氣。由經而外鬱於表。此時如認定決非少陰戴陽證。內清其燥。外解其熱。其病自退。萬不可攻下。若認爲攻下腸胃之燥。其面